

## Hiika iimaanaa-Kutaa 2

### Description

Kutaa darbe irraa itti fufuun hiika iimaanaa bal'innaan haa ilaallu.

#### **2-Dubbii Salafoota irraa**

Dhimma kana ilaalchisee hiika iimaana caalatti ifa gochuu fi dogongora faallessitoota ibsuuf dubbii salafu salaahi (dhaloota gaggaarii darban) garii isaanii ni dhiyeessina. Haala armaan gadi kanaan ifa gabaaba kanaa dhiyeessina:

**(A)-Hiikni iimaanaa: dubbii fi hojii qalbii** of keessatti qabata. **Dubbiin qalbii- amanuu fi dhugoomsudha.** Wanta beeksiisan keessatti Ergamtoota dhugoomsun dirqama. “Dhugoomsun qalbii yoo deeme (badee), kutaaleen hafan nama hin fayyadan. Kanaafu, qalbiidhaan dhugoomsun sharxii (ulaagaa)dha.” (Kitaabu Salaat-Ibn Al-Qayyim-fuula 54)

(Hojiin hojjatan kamiyyuu nama fayyaduu fi Rabbiin biratti fudhatama argachuuf arkaana iimaana jahan dhugoomsun ykn itti amanuun sharxii (ulaagaa) hafuu hin qabneedha. Sharxiin kuni yoo hin jiraatin, hojiin gaariin kamiyyuu nama hin fayyadu, Rabbii olta'aa biratti fudhatama hin argatu.)

Ammas, iimaanni hojii qalbii kan akka ikhlaasa, jaalala, sodaa, abdachuu, ol-guddisuu, masakamuu, tawakkula (irratti hirkachuu) fi kanneen biroo of keessatti qabata. (Ilaali Al-Iimaan-ibn Mundih 2/362, Majmuu'al-fataawaa-ibn Taymiyah, 7/186, 13/119, Ma'aarijul Qabuul-Hakamiyy-2/18)

“Dhugaan amanuu waliin hojiin qalbii yoo deeme, ahli sunnaan iimaanni kan deemu ta'uu irratti wali galanii jiru. Hojiin qalbii dhabamuu waliin dhugoomsun nama hin fayyadu waan ta'eef.” ((Kitaabu Salaat-Ibn Al-Qayyim-fuula 54)

Dhimma kana ilaalchise jechoota filatamoo nan dhiyeessa:

Ibn Taymiyaan (rahimahullahu) ni jedha: “Dhugumatti iimaanni hundeen isaa iimaana qalbii keessa jiruudha. Kana irraa wantoonni lama hafuu hin qaban: **1ffaa– qalbiin dhugoomsu, mirkaneessuu fi beekudha.** Kuni dubbii qalbii jedhama. Juneyd ibn Muhammad ni jedha: Tawhiinni dubbii qalbiiti. Tawakkulli (Rabbitiin irratti hirkachuu) hojii qalbiiti. Kanaafu, dubbii fi hojii qalbii wanta hafuu hin qabneedha. **2ffaa– dubbii fi hojii qaamaa.** Kana irraa hojii qalbii hafuu hin qabu. Fakkeenyaaaf, Rabbii fi Ergamaa Isaa jaallachuu, Rabbitiin sodaachu, wanta Rabbii fi Ergamaan Isaa jaallatan jaallachuu, wanta Rabbii fi Ergamaan Isaa jibban jibbuu, hojii Rabbiiif qulquelleessu (ikhlaasa), qalbiin Rabbii Tokkicha irratti hirkachuu fi hojiiwan qalbii biroo Rabbii fi Ergamaan Isaa dirqama godhee fi iimaana irraa taasissee. (Kunniin hojii qalbiiti.)

Ammas akkana jedha: wanta jaallatamaa tokko beekuun akka isa jaallatan nama taasisa. Ol-guddifamaa beekuun akka ol-guddisan nama taasisa. Sodaatamaa beekuun akka isa sodaatan nama taasisa. Rabbitiin beekuu fi dhugoomsuun, maqaalee gaggaarii fi amaloota ol'aanoo akka qabu beekun, qalbiin akka Isa

jaallattu, Isa ol guddistuu fi sodaattu taasisa. Kunis Isaaf ajajamuuf fedhii akka qabaatanii fi Isa faallessu akka jibban nama taasisa. Dandeetti waliin fedhiin cimaan wanti barbaadamu akka argamu barbaachisa.” (Majmuu’al fataawaa 7/525)

Bakka sadaffatti barbaachisummaa hojii qalbiiakkana jechuun jabeessa: hojiwwan qalbii hundee iimaanaa fi bu’ura amantii irraayyi. Fakkeenyaaaf, Rabbii fi Ergamaa Isaa jaallachuu, Rabbiin irratti hirkachuu, Rabbiif amantii qulqulleessu, Isaaf galata galchuu, murtii Isaa irratti obsuu, Isa sodaachu, Isa abdachuu... akka wali galtee iimaamota amantiitti hojiwwan kunniin hundi uumamtoota hunda irratti dirqama kan ta’eedha. “ (Majmuu’al fataawaa 10/5)

Ammas akkana jedha: “Gabaabumatti, iimaana qalbii keessa jiru irraa Rabbii fi Ergamaa Isaa dhugoomsun, Rabbii fi Ergamaa Isaa jaallachuun waan hafuu hin qabneedha. Ta’uu baannan, akka walii galtee Muslimootatti, Rabbii fi Ergamaa Isaa jibbuu fi diina itti ta’uu waliin dhugoomsun qofti iimaanaa miti.” Majmuu’al fataawaa 7/537)

Ibn Al-Qayyimis barbaachisummaa hojii qalbiiakkana jechuun ifa godha: hojiwwan qalbii hundee barbaadamaniidha. Hojiwwan qaamaa immoo [hojii qalbii] kan hordofanii fi guutaniidha. Niyyaan akka ruuhiti. Hojiin immoo akka qaamaa yoo ruuhin isarrea addaan baate du’uti. Akkuma kana hojiinis niyyaan yoo waliin hin ta’in sochii taphaati. Murtiwwan qaamaa beekuu caalaa murtiwwan qalbii beekuun baay’ee barbaachisaadha. Murtiwwan qalbii hundee waan ta’aniif, murtiwwan qaamaa murtiwwan qalbii irratti damee godhatu.” (Bidaa’ul Fawaa’id 3/224)

Ammas akkana jedha: “Bakka irraa jalqabuu fi itti bu’uu keessatti namni shari’atti xinxalle, hojiwwan qaamaa hojiwwan qalbiitiin akka walitti hidhaman ni beeka. Hojiin qaamaa hojii qalbii malee nama hin fayyadu. Hojiwwan qaamaa caalaa hojiwwan qalbii gabricha irratti dirqama kan ta’aniidha. Gabbarrii qaamaa caalaa gabbarriin qalbii guddaadha, baay’eedha, itti fufaadha. Yeroo hunda keessatti dirqama.” (Bidaa’ul Fawaa’id 3/230)

Ibn Taymiyaan ni jedha: iimaanni dhugoomsu qofaa miti. Kana irra, dhimma biraahafu hin qabnetu jira. Innis, hojii qalbii jaalala, masakamuu fi fudhachuu of keessatti hammateedha... Ergasii ni jedha:

“Timaanni dhugoomsu of keessatti haa qabatuyyu malee dhugoomsu qofaa miti. Iimaanni mirkaneessu fi tasgabbiidha. Kunis, dhugoomsuun odeefanno qofaaf oola. Ajaja keessa immoo ajajuu waan ta’eef dhugoomsun hin jiru. *Jechi Rabbii odeefanno fi ajaja.* Odeefannoon kan beeksisee akka dhugoomsan namarraa barbaada. Ajajni immoo Isaaf masakamuu fi harka kennuu namarraa barbaada... Odeefanno dhugoomsuun yoo qunnaman, ajaja immoo masakamuun yoo qunnaman, qalbii keessatti hundeen iimaana argamee jechuudha. Hundeen kunis, tasgabbi fi mirkaneessudha. Dhugumatti, iimaanni jecha “Al-Amn” jedhu irraa kan baafameedha. Al-amn jechuun qubanna fi tasgabbiidha. Kunis (tasgabbiin) kan argamu dhugoomsu fi masakamuun qalbii keessatti yoo hidda qabatedha.” (As-Saarimul Masluul-fuula 519)

(Rabbitin subhaanahu wa ta’alaa Kitaaba buusuu fi Ergamtoota erguun waa’ee Isaa, Guyyaa Qiyaamaa fi wantoota biroo ijaan hin mul’anne beeksisee jira. Kuni odeefanno dhugoomsu qabaniidha. Ammas, Isa qofa gabbaruutti, salaatatti, zakaatti, soomatti, hajjii fi hojii gaggaarii birootti ajajee jira, hojii badaa hunda irraas dhoowwe jira. Kunniin ajajoota itti buluu qabaniidha. Kanaafu, namni odeefanno Rabbitin

irraa dhufee yoo dhugoomse fi ajajoota Isaatti bule, hundeen iimaana qalbii isaa keessatti hidda qabataa jechuudha. Jirenyaa keessatti tasgabbii argata.)

Dubbii kana keeyyata ibn Al-Qayyiim (rahimahullahu)akkana jedhuun guduunfina: “Dhimma hojii hundaa qalbiidhaan amanuu, dhugoomsu fi jaallachuutu hordofu. (Kana jechuun hojii gaggaarii hojjatan keessatti qalbiidhaan amanuun, dhugoomsu fi jaallachuun waan hafuu hin qabneedha.) Kuni [mataan isaatu] hojiidha, inumaa hundee hojiiti. Dhimma iimaanaa ilaachise kuni wanta dubbattooni (mutakallimiina) baay’een daguu (gaflaa) keessa itti ta’aniidha. Isaan hojii malee iimaanni dhugoomsu qofa akka ta’etti yaadan. Kuni dogongora hundarra fokkuu fi guddaa ta’eedha. Dhugumatti, kaafironni baay’een Nabiyyiin (SAW) dhugaa akka ta’ee jala muranii mirkaneessu, kana hin shakkan. Garuu hojiin qalbii kan akka wanta Nabiyyiin fide jaallachuutu, itti gammaduu fi fedhuu dhugoomsu kanatti hin hidhamne. (Kaafironni baay’een nabiyyiin dhugaa ta’uu haa mirkaneessanii malee, wanta Nabiyyiin fide hin jaallatan, itti hin gammadan, hin hordofan. Kanaafu, hojiin qalbii fi qaamaa yoo hin jiraatin dhugoomsun qofti iimaana hin jedhamu.) Mata duree kana hin dhiisin. Dhugumatti, garmalee barbaachisaadha. Kanaan haqiqaan iimaana beekkama.” (Mukhtasar As-Sawaa’iqil mursalati-2/420)

### **Wantu darbee irraa wantoota armaan gadii ni hubanna:**

- 1-Guddinna dhimma hojii qalbii. Hojiin qalbii ruuhii ibaadati. Kanarratti dabalatee, yeroo hunda keessatti uumamtoota hunda irratti dirqama.
- 2-Iimaanni qalbiin wal qabatu hundee lama irra dhaabbata: **haqa dhugoomsuu fi itti amanuu, haqa kana jaallachuu fi fedhuudha.** Kana jalqabaa hundee dubbiiti. Kan lammataa hundee hojiiti.
- 3-Dhugoomsun mataa isaa qofaan akka iimaana shari’attii hin lakkaawamu. Kana irra, shari’aa Rabbiitiif masakamuu fi gadi jechuun wanta hafuu hin qabneedha. Ta’uu baannan, amanti Islaamaa irraa wanti dirqamaan beekkamu keessaa warri kitaabaa fi Mushrikooni durii fi ammaa baay’een isaanii Muhammad (sallallahu aleih wassallam) Ergamaa Rabbiitiif fi dhugaa akka ta’e ni beeku. Garuu isaan kana waliinu kaafirota. Sababni isaas, wanta dhugoomsun kuni namarrea barbaadu isaan hin hojjanne. Kan akka, jaallachuutu, ol-guddisuu, Ergamaa Rabbiitiif ajajamuu fi kan biroo hin hojjanne.
- 4-Gareen Murji’atul Karaamiyyah jedhamtu yommuu “iimaanni arraba qofaan mirkaneessudha” jechuun yaadan dogongoranii jiru. Akka waligaltee Muslimootatti (Ijmaa’atti) munaafiqonni shahaadateyn haa mul’isaniyyu malee kaafirota. Rabbiin subhaanahu wa ta’alaa ni jedha:

 وَمِنَ النَّاسِ مَنْ يَقُولُ إِنَّا بِاللَّهِ وَبِالنَّبِيِّ وَالْأَخِرِ وَمَا هُمْ بِمُؤْمِنِينَ

**“Namoota keessaa nama, “Rabbi fi Guyyaa Aakhiraatti amanne.” jedhutu jira, garuu isaan warra amananii miti.”** Suuratu Al-Baqara 2:8

Munaafiqoota irraa jechi zaahiraa (gubbaa) mul’ate jira. Garuu qalbii keessa dhugoomsu fi wantoonni biroo barbaachisan waan hin jirreef iimaanni isaan irraa ni dhabame.

5-Jahmiyyah irraa Murji’an hojii qalbii keessa jiruun alatti iimaanni guutuu ni ta’ a jedhanii yommuu yaadan dogongora guddaa hojjatanii jiru.

(Jahmiyyan hordoftoota Jahm ibn Safwaan Samarqadiyy-bar 128 hijr keessa ajjeefame. Gareen kuni

---

sifaata Rabbii ni dhabamsiisu, amanti biroo Qur'aana fi Sunnah faallessu qabu.)

**(B)- Ammas hiikni iimaanaa dubbii Arrabaa fi hojii qaamolees of keessatti qabata.** (Ibsa kanaa kutaa itti aanu keessatti ilaalla....)

### Guduunfaa

?Iimaanni dubbii qalbii, hojii qalbii, dubbii arrabaa fi hojii qaamolee of keessatti qabata.

?Dubbiiin qalbii arkaana iimaaana jahanitti amanuu fi dhugoomsudha.

?Hojiin qalbii immoo kan akka jaallachuu, ikhlaasa, galata galchuu, obsa, ol-guddisuu, kabajuu... fi kkf.

?Dubbiiin arrabaa shahaadateyni dubbachuu fi wantoota isaaniin wal qabatan mirkaneessudha.

?Hojiin qaamaa immoo wanta qaaman hojjatamu kan akka salaata, waan gaariitti ajaju fi waan badaa irraa dhoowwu...

?Hundeen kana hunda **dubbii fi hojii qalbiiti**. Kana jechuun hundeen hojii qaamaatii fi dubbii arrabaa: amanuu, dhugoomsu fi jaallachuu, ikhlaasa, ol-guddisuu...

Fakkeenyaaaf, salaanni osoo arkaana iimaanatti hin amaniini fi hin dhugoomsin nama fayyaduu danda'aa? Hin danda'u. Kanaafu, qalbiin amanu fi dhugoomsun hundee hojiiti jechuudha. Amanuu fi dhugoomsun immoo dubbii qalbiiti. Ammas, erga arkaana iimaanatti amananii fi dhugoomsanii booda, salaata keessatti ikhlaasni yoo hin jiraatin, salaanni kuni nama fayyadu ykn fudhatama argachuu danda'aa? Hin danda'u. Kanaafu, Gabbaramaa (Ilaah) jaallachu fi ol-guddisuu waliin ikhlaasni hundee hojiiti. Jaallachuun, ol guddisuu fi iklaasni immoo hojii qalbiiti. Haala kanaan, dubbii fi hojiin qalbii hundee hojiwwan qaamaatii fi dubbii arrabaa akka ta'e nuuf gala.

?Tuqaa ijoo kana hubannee jirraa? Yoo hin hubatin, irra deddeebine haa dubbisnu.

Madda: [\*\*"Nawaaqidul Iimaani al-qawliyah wal amalayah"\*\*](#) fuula 18-23, Abdulaziz bin Muhammad

### Date Created

March 20, 2020

### Author

admin